


TEZAUUR LITURGIC
28 SEPTEMBRIE

ACATISTUL
SF. MUCENIC
ALEXANDRU
DE LA
ANTIOHIA
PISIDIEI



MOSCOVA, 2000



Акафист

святому мученику

Александру Каталитскому

Кондак 1

Избранный страстотерпче от града Каталита, во страдании своем крещение приявый, и тем благодати исполнивыйся, приими моление наше, яко имеяй дерзновение ко Господу, от всяких нас бед свободи, верно зовущих ти: Радуйся Александре, мучениче Каталитский.

Икос 1

Ангелов и всея твари Творец Премилосердный, приемлющий первых с последними, избра ты во утверждение веры нашея, мучителя ты в мученики претвори словом истины, мы же, дивящися таковому о тебе промыслу Вседержителя, со умилением вопием ти: Радуйся, града Каталита украшение, Радуйся, веры православная утверждение; Радуйся, силою свыше просвещенный, Радуйся, Господом вразумленный; Радуйся, обращением твоим Ангелов удививый, Радуйся, лик святых

возвеселивый; Радуйся Александре, мучениче Каталитский.

Кондак 2

Видя гонение нечестивых на христиан, возопи Господь гласом великим, возводя ум твой на высоту богоразумия, повеле пострадали с избранными, сего ради в надежде на неизреченное милосердие и откровение Божие вопием Ему: Аллилуйя.

Икос 2

Разумно уразумев Александре в словесех сих Господа, со братией своею Алфеем и Зосимою дерзновенно исповедал себе быти Христовым, темже похваляюще дерзновение твое, глаголем ти сице: Радуйся, жизни своея долгоденствие в идолослужении презревый, Радуйся, за Христа Бога Истиннаго пострадали восхотевый; Радуйся, со братией Пресвятыя Троицы образе и носило, Радуйся, надежды нашея веро и сило; Радуйся, научаяй присно возносить ум к Богу, Радуйся, обретый истинную от грехов свободу; Радуйся Александре, мучениче Каталитский.

Кондак 3

Сила милосердия Божия на тебе открыся, Христос Бог наш, повелеваяй солнцу Своему

восходити над злыми и добрыми, просвети сердце твое богослышанием, Ему же во страдании своем воспел: Аллилуйя.

Икос 3

Имея сердце, Господом озаренное, по внушению Его, пострадати изволивый за имя Христово, прием во уста, аки манны небесныя, олово раскаленное, предавая дух, Господу поклонивыйся, мы же, терпение твое восхваляюще, зовем ти таковая: Радуйся, мучениче, от рук незаконных израненный, Радуйся, исповедания ради оловом опаленный; Радуйся, Господу сердце свое покоривый, Радуйся, чашу страданий до конца испивый; Радуйся, во искушениях терпению нас научающий, Радуйся, верныя мужеством твоим насыщающий; Радуйся Александре, мучениче Каталитский.

Кондак 4

Бурею одержими помышлений злобных, нечестивии vedoша святого Марка истязати, призва ты, кузнече, и братии твоих, во мучители, вы же, видя веру непоколебиму, дивящися чуду, воспели Христу Богу: Аллилуйя.

Икос 4

Слышавше от тебе нечестивии исповедание Христовой веры, распыхахуся на тя злобою, и умерщвлению предаде, сего ради мир православный славит тя сице: Радуйся, мучеников соревнителю, Радуйся, Света Христова носителю; Радуйся, веры бесовския посрамление, Радуйся, грешников вразумление; Радуйся, в мале Господу послуживый, Радуйся, двери райския с честью открывый; Радуйся Александре, мучениче Каталитский.

Кондак 5

Боготечней звезде уподобился Александре, Солнце правды проповедал еси, тьмою одержимым, и во хвалении Господа смерть приявый, тому купно с тобою воспеваем: Аллилуйя.

Икос 5

Видя чудеса силы Божия на тебе бываемая, восклицаю: «Пение ми даруй, Боже мой, воспети и глаголати подвиги страсотерпца твоего и мученика Александра, в лице мучеников возсиявшаго, и молящагося непрестанно о всех нас», тому, Господи, в Тебе прославльшемся воспеваем: Радуйся, яко мужеством твоим

небожители возвеселишася, Радуйся, подвигом твоим многи укрепишася; Радуйся, Света Христова носителю, Радуйся, молящихся тебе на небеси водителю; Радуйся, цветок благоуханный, Радуйся, Александре мучениче православный; Радуйся Александре, мучениче Каталитский.

Кондак 6

Проповедник благовестный, Святый Марк, во страдании своем и терпении, тебе, Александре, примером послуживый и Христу Богу нашему пети научивый: Аллилуйя.

Икос 6

Воссиявый Господь в Воскресении Своем, смерти победителю, избави тя от адова истления и жизнь даровав, мы же в надежде живота вечнаго молящися не престаем восклицати: Радуйся, сердце для Господа открывый, Радуйся, язычество во языцех посрамивый; Радуйся, образе превысшаго богословия, Радуйся, достигший небеснаго сословия; Радуйся, адова тления избежавый, Радуйся, кузнече, подвигом исповедничества спасение свое сковавый; Радуйся Александре, мучениче Каталитский.

Кондак 7

Хотяй веру православную утвердити, возжег сердце твое Господь, аки светильник, мы же, зряще во свете Христа Бога нашего, поем Ему: Аллилуйя.

Икос 7

Новаго мученика и страстотерпца показа тя Господь, новаго человека Божия тя являя, новую землю и новое небо отверзая нам, пети понуждая сице: Радуйся, яко во уповании на Бога не посрамился еси, Радуйся, яко во царствии небесном водворился еси; Радуйся, яко Бог прослави тя десницею крепости, Радуйся, посрамивый бесовския дерзости; Радуйся, скорби наша молением твоим растворяеши, Радуйся, любовью к Богу сердца наша запалаяеши; Радуйся Александре, мучениче Каталитский.

Кондак 8

Странное чудо о тебе познаша, устранимся суетнаго мира, ум на небеса возведем, идеже ты с Господем пребывавши, поя: Аллилуйя.

Икос 8

Вси поем подвиг твой Александре, почитаем страдание, хвалим долготерпение, ублажаем кончину твою, воистинну, что добро или что красно, но еже жити, паче умерети вкупе во Христе Иисусе за веру свою, мы же, недостойнии, единеми усты, единым сердцем славим и воспеваем страдания твоя сице: Радуйся, слова Божия устрашивыйся, Радуйся, воле Его покоривыйся; Радуйся, образе кончины святых давай, Радуйся, за грехи земли своея пострадавай; Радуйся, кончиною своею Богу угодивый, Радуйся, даже до смерти мученическаго Его возлюбивый; Радуйся Александре, мучениче Каталитский.

Кондак 9

Всего себе Господу Богу предав, страсотерпче Христов, егда узрел помышление нечестивцев - раскрыти уста твоя и олово кипящее влити, сего ради яко великий таинник Божия благодати, удостоился еси венца нетленнаго, поя Богу: Аллилуйя.

Икос 9

Вития многовещанная, яко рыбы безгласная, не возмогут изрещи спасительный промысл о

человецех - мучитель с лики мучеников
вчиняется, и ризою светлою облачается, моляще
о нас, поющих ти сице: Радуйся, ко Господу во
страдании пришедый, Радуйся, яко приял еси
венец победы; Радуйся, всех борющихся с
грехами покровителю, Радуйся, покаяния
нашего пред Богом поручителю; Радуйся, яко
молитвами твоими Господь оставляет
прегрешения, Радуйся, помогаяй нам перенести
скорби и поношения; Радуйся Александре,
мучениче Каталитский.

Кондак 10

Спаستися хотяй всем человекам, и в разум
истинный прийти, иже на крови мучеников
Церковь свою основавый, Христос Бог наш,
избравый тя, Александре, во основание новыя
храмины своея, да сущия в ней верно вопиют:
Аллилуйя.

Икос 10

Стена еси всем к тебе прибегающим и
необоримое ограждение миру православному,
зане тако благоволи о тебе небеси и земли
Творец, темже и нас научи приглашати тебе:
Радуйся, честное Христово избрание, Радуйся,
непорочное Богови благоухание; Радуйся, от
нечаяных зол чтущих тя покрывающий,

Радуйся, души наша миром исполняющий;
Радуйся, сокровенная мира духовнаго нам открывающий, Радуйся, познати истину нам помогающий; Радуйся Александре, мучениче Каталитский.

Кондак 11

Пение похвальное приносим ти, страстотерпче Александре, устне сердца смиренно любовью отверзающе, Богу укрепльшему и прославльшему тя зовем: Аллилуйя.

Икос 11

Светом невещественным возсиял еси в селениих святых и радости неизреченныя исполнивыйся, со ангелы хвалу Господу воспеваеши, и нас, мраком суетнаго мира озлобленных, не оставляеши, зовущих ти сице: Радуйся, пред Царем Царей обеты хранить помогаеши, Радуйся, терпети в вере, надежде и любви научаеши; Радуйся, плененных во гресех свободителю, Радуйся, от соблазнов мира сего защитителю; Радуйся, доброделающих предстателю, Радуйся, пред иконою твоею молящихся скорый послушателю; Радуйся Александре, мучениче Каталитский.

Кондак 12

Благодать дана ти от Бога, Александре, предстоя престолу Царя Славы, молитися за ны о прощении, да избавимся предстательством твоим пленения диавольскаго и воскликнем Богу: Аллилуйя.

Икос 12

Славную кончину твою поюще, еюже возвеличился еси, яко светлый мученик Христов, молим тя, страстотерпче Александре, буди нам во всем ко благу помощниче и услыши ны, усердно взывающих ти: Радуйся, души нашея сокровище нетленное, Радуйся, Церкви нашея украшение многоценное; Радуйся, милостивый христианом заступниче, Радуйся, присный о нас молитвенниче; Радуйся, у одра смертнаго молитися Богу наставляеши, Радуйся, на мытарствах страшных души наша для Господа восхищаеши; Радуйся Александре, мучениче Каталитский.

Кондак 13

О преславный мучениче Христов Александре, прими хвалебное пение сие, в надежде и вере на твое предстательство приносимое, умоли Господа Бога даровати нам оставление грехов и

жизнь вечную, и по часе смертнем внити в обители райския, идеже ты ныне пребываеши и Господу Богу нашему поеши: Аллилуйя, аллилуйя, аллилуйя. (Сей кондак читается трижды)



**ПОЛНЬІЙ
АКАФИСТНИК
КАНОНИЧЕСКІЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**